

Tuesday, January 6, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



ECONOMICS & STATISTICS DEPT

Economic & Statistics department-in a chhinchhiah danin Mizoramah kum 2023 leh 2024 chhung khan mitthi 17,814 an awm a; heng zinga za zela 30 point 07 hi kum 70 chunglam niin, thalai kum 25 - 44 inkar thi ten an dawt a ni.

Sawrkar chhinchhiah danin, kum 2023 chhung khan Mizoramah mitthi 9,037 an awm a, kum 70 chunglam thi 2,828 awmin an tam ber a; kum 2024 chhung khan mitthi 8,777 awmin, kum 70 chunglam thi mi 2,528 an awm a, kum 2024 chhunga kum bithliah hrang hranga thi tam berna an ni leh bawk.

Kum 2 chhung hian Mizoramah kum 35-44 inkara thi mi 2,435 an awm a; kum 45-54 inkara thi mi 2,335 leh kum 55-64 inkar thi mi 2,274 bakah, mitthi kum zat hriat loh hi kum 2023-ah khan mi 13 leh kum 2024-ah khan mi 1,050 an awm bawk. Kum 2023 aiin kum 2024-ah khan mitthi zat hi mi 260-in an tlem zawk a ni.

Kum 2023 leh 2024 chhung hian Mizoramah thalai kum 25 - 44 inkar thi mi 3,931 an awm a; kum 2 chhunga mitthi zat zawng zawng atanga chhûtin kum 25 - 44 inkar thi hi za zela 22 point 07 a tling a. Kum 2 chhunga thi tam ber kum 70 chunglam mi 5,356-te hi mitthi zawng zawng atangin za zela 30 point 07 a ni bawk.

Kum 2 chhung vek hian kum 1 hnuailam thi mi 619 an awm a, kum 1-4 inkar thi mi 182, kum 5-14 inkar thi mi 265 leh kum 15 -24 inkar thi mi 270 an awm a; mitthi zat chhinchhiahna atanga a lan danin, kum 2023 leh 2024 chhung khan kum 24 hnuailam thi hi chawhrualin mi 417 ang an ni a, kum 25 chin chunglam thite erawh chawhrualin mi 2,513 an ni thung.

Economic & Statistics department-in a tarlan tawh chinah nikum 2025 khan January atanga April thla chhungin mitthi 2,934 an awm a; heng zinga 86 hi kum 1 hnuailam niin, kum 1-5 inkar mi 13 leh thi saa piang 34 an awm. Nikum January - April thla chhung vek khan Mizoramah naupiang 7,307 an awm bawk a ni.



VIKSIT BHARAT YOUNG LEADERS DIALOGUE 2026

Serchhip DC Pu Paul L Khuma chuan vawiin khan Viksit Bharat Young Leaders Dialogue 2026, January ni 9 leh ni 12 chhunga Bharat Mandapam, New Delhi a neih tura Mizoram aiawha Serchhip district atanga tel tur thalai 16 vai liam.

DC chuan Viksit Bharat Young Leaders Dialogue, 2026 a kal turte thlahna hunah hian Serchhip District atanga tel turte chuan chanvo tur leh inpuahchahnate a sawipui a. Thalaite chuan sawrkarin hun remchang a siam sak avangin lawmawm a tih thu a sawi a. Midang nena inthian thatna leh inkungkaihna tha siam kawnga midang entawn ni turin a fuih a. Tluang taka hun hmang tura duhsakna hlanin a vai liam a ni.

He hunah hian Govt Serchhip College Principal Pu C. Laldintluanga leh Associate Professor Pu K. Lalrinchhana, Govt Serchhip College-a Phunchawng Cultural Club incharge te an tel a. Thalai mi 16 te hi My Bharat (Mera Yuva Bharat) member te an ni.



LAWNGTLAI WEST MLA

Lawngtlai West bialtu MLA Pu C. Ngunlianchunga leh sawrkar mi pawimawh ten tukin khan Lawngtlaia Tawngtaina Tlang, Bethel Prayer Mount panna kawng laihzauh leh Lirthei dahna tur mumal zawka siam dan tur an enfiah.

Bethel Prayer Mount hi fianriala Pathian pawl thin ten an pan ber niin Camping leh Crusade te pawh neih thinna a ni a, a panna kawng chu a tet vangin Lirthei insulpel theih a ni lova, hei bakah hian Lirthei hunna duhthusam a awmluh avangin Pu C.Ngunlianchunga chuan kawng laihzauh a inhuam thu leh Lirthei dahna pawh mumal zawka siam tha a tih thu Lawngtlai Bawrhsap Pu Donny Lalruatsanga chu hrilhin, he hna thawktura enfiah hmasak ngai, kawng zauh dan tur leh thildangte tukin khan Lawngtlai West MLA leh Lawngtlai Bawrhsap chuan an en a, Pu Donny Lalruatsanga chuan Pu C.Ngunlianchunga inhuamna chu lawmawm a tih thu sawiin, khawpui thang zel tan pawn kawng laihzau leh lirthei dahna siam chu thiltha tak a nih thu a sawi a, DC Office lamin he hna thawh a nih theih nan buaipuiturte an lo buaipui hmasak a ngaihthu leh a ranglama hmalak a nihtheih nan theihtawp an lo chhuahtur thu Lawngtlai West MLA hi a hrilh a ni.



ADVISER TO CM

Adviser to CM Pu TBC Lalvenchunga leh sawrkar mi pawimawh ten vawin khan SASCI Sum, Cheng Vaibelchhe 12 sen na - National Highway No.06 Khankawn atanga - Champhai Kanan veng thleng, Champhai luhka a kawngpui zauhna tur sial mek an enfiah.

Pu TBC Lalvenchunga chuan Kawngpui tha an neih theih nan theihtawp an chhuah zel dawn tih sawiin kawngpui laih zauh hna kal mekah hmun thenkhatah harsatna a awm avangin ruahmanna thar siam a ni a ti a, sawrkarin theihtawp a chhuah zel dawn a ti bawk.



SIAHA UNION MoS VISIT PREPARATION

Vawiin khan Union Minister of State for Home Affairs Pu Bandi Sanjay Kumar in Siaha a tlawh tur chungchang sawiin Siaha DC Mini Conference Hall ah thutkhawm a ni.

Thutkhawm hi Addl DC Pu Abraham Beirazi Khithie chuan kaihruiin Sawrkar Department hrang hrang hotute an tel a, Sawrkar laipuia Minister of State for Home Affairs in a January ni 21 ah Siaha tlawh a tum chungchang sawiho niin thil tul hrang hrang ngaihtuah a ni a, inpuahchah dan tur leh a thlen huna hun hman dan tur hrang hrang sawiho a ni a, vawiina thutkhawmah hian department hrang hrang bakah mimal mawhphurhna ruat a ni bawk.



ESTHER HNAMTE

Ramchunga naupang chawimawina Pradan Mantri Bal Shakti Puruskar Award dawngtu Esther Hnamte chu nizan khan Reliance Company neitu leh Asia rama pa haus a ber ti a hriat Pu Mukesh Ambani Inah a zai.

Pu Mukesh Ambani hian India Cricket Team mipa leh hmeichhia ten hlawhtlinna duhawm tak an neih a lawmpuina pual a hun a buatsaihah hian Bollywood film star lar tak tak an tel a, heng zingah hian Mizo naupang Esther Hnamte chuan Teri Mitti tih Hindi hla chu a sa a. Esther Hnamte hi a nu leh a putea ten an hruai a, ruahman dan chuan vawiin lam hian Mizoram an rawn pan ang.

A kawr hak tur hi Pu Mukesh Ambani te chhungkua in an ruahman sak a ni a, Fungsi ten Mizo puantahna atanga an kutchhuak a ni a, a kawrah hian hmasang atanga Mizote ngainat pangpar a chuang a, puan pawl an hmang a ni.

